

Pa Korentián Pulosay Domi Kágad Pa Korentián Pulosay Domi Kágaday bárawá

Salám o drót

¹ Cha Pulosay némagá, mane Pulos ke cha Hodáay razáyá Issá Masihay kásedé án, o cha may brát Timutáusay némagá,

pa Hodáay hamá kelisáyá ke Korentay shahrá ent o pa sarjamén Akáyahay damagay sajjahén palgártágénán.*

² Cha may Hodáén Pet o Hodáwandén Issá Masihay némagá shomará rahmat o émeni sar bát.

Ásudagiay Hodá

³ Hodáyá, bezán may Hodáwandén Issá Masihay Petá satá o saná bát ke rahmdelén Peté o har paymén delbaddhiay Hodá ent.

⁴ Har wahdá ke má sakki o sóriáni tahá bén, Hodá mára delbaddhia dant tánke má hamá mardomán delbaddhi dát bekanén ke sakki o sóriáni tahá ant, gón hamé delbaddhiá ke Hodáyá mára dátag.

⁵ Chéa ke Masihay háterá má haminchok géshter sakki o sória saggén, haminchok geshter mára Masihay barkatá delbaddhi ham rasit.

* **1:1 1:1** Palgártágén, bezán hamá mardom ke gón Issá Masihay hóna cha gonáhán shódag o pák kanag butag o é dhawlá pa Hodáyá dar chenag butag.

⁶ Agan má sakki o sóriáni ámach† én, é pa shomay delbaddhi o nejátá ent o agan mára delbaddhia rasit, é ham pa shomay delbaddhiá ent tánke hamé sakkián ke má saggagá én, shomá ham sagget bekanét.

⁷ Má pa shomá mohkamén óst o omété dárén o zánén ke hamá paymá ke shomá may sakki o sórián sharikdár ét, may delbaddhiá ham sharikdára bét.

⁸ Oo brátán! Má nalóthén ke shomá hamá sakki o sóriáni hálá sahig mabét ke má Ásiáy damagá‡ saggetagant. Anchén mosibaté may sará kaptagat ke cha may bardáshtá dhann at o má zenday omét ham yalah dátagat,

⁹ má gwasht ke nun mára markay sezá rasetag. Paméshká é paymá but ke cha wati jendá may omét halás bebit o tawkalá Hodáay sará bekanén ke mordagán zendaga kant.

¹⁰ Áiá mára cha markay dapá rakként o angata rakkénit. Má ométa kasshén ke démterá ham mára rakkénit,

¹¹ chéá ke shomá pa má dwá kanagá ét o é pa má komakké. Á wahdá bázéné pa maygi Hodáay shográ gipt, pa hamá nyámatá ke bázén mardoméay dwáyáni barkatá mára rasetag.

Pulosay erádahay badal bayag

¹² Nun may pahr esh ent o may zamir sháhedia dant ke é donyáyá má wati zend gón Hodáay dátagén pákdeli o nékniyatiá gwázéntag, háss gón

† 1:6 1:6 Ámach, bezán dochár, shekár. ‡ 1:8 1:8 É ketábay nebisagay wahdá, Ásiáy máná annugén Torkiahay rónendi némag at.

shomá. Má é kár gón donyái dánáié nakortag, gón Hodáay rahmatán kortag.

¹³ Má pa shomá choshén chizzé nebeshtaha nakanén ke shomá wánti makanét yá sarpad but makanét. Maná omét ent ke

¹⁴ hamá paymá ke shomá tán haddéá sarpad butagét, godhsará sharriá sarpada hét ke shomá may sará pahr basta kanét, anchó ke má Hodáawandén Issáay áyagay róchá shomay sará pahra bandén.

¹⁵ Man é gappá deljam atán, paméshká man lóthet pésará shomay gendagá byáyán ke shomará do randá páedag berasit.

¹⁶ Mani delá at ke Makduniahay saporá shomay kerrá mán betarrán o cha Makduniahá watarriay wahdá ham, tánke shomá maná pa Yahudiahay saporá madat bekanét.

¹⁷ Man ke é erádahá kanagá atán, bázén pegréá rand wati paysalahon kort. Man donyái warh o paymá paysalaha nakanán o yakkén damáná “haw, haw” o “enna, enna” nakanán.

¹⁸ Hodáay sawgend ent ke may gapp pa shomá “haw” o “enna” naent.

¹⁹ Chéá ke Hodáay Chokk, Issá Masih ke man o Silwánus§ o Timutáusá shomay kerrá áiy jár jat, “haw” o “enna” naent, áiy paygám modám “haw” ent.

²⁰ Hodáyá har wádahé ke kortag, Issá Masihay barkatá “haw” ant, paméshká Masihay barkatá má pa Hodáay shán o shawkatá “ámin” ham gwashén.

§ 1:19 1:19 Silwánus hamá Silás ent ke Kásedáni Káray ketábá ham áiy nám geraga bit.

21 Nun é Hodá ent ke Masihay ráhá mára gón shomá horigá mohr o mohkama kant. Áiá mára rógen per mosht* o

22 mára wati mohri jat o zamánatay hesábá Pákén Ruhi may delá nádént.

23 Hodá sháhed ent, man nalóthet ke shomára hakkal o neherr bedayán o paméshká Korentá nayátkán.

24 Má shomay imánay sará wájahi kanaga nalóthén, pa shomay shádmániá gón shomá hór kár kanaga lóthén, chéá ke shomá imánay barkatá mohr óshtátagét.

2

1 Gorhá man erádah kortagat ke padá shomay kerrá mayáyán o shomára gón wati hakkal o neherrán gamig makanán.

2 Chéá ke agan man shomára gamig bekanán, gorhá pa mani shádmán kanagá kay pashta kapit? Hamá mardom ke man gamig kortagant?

3 Man paméshká kágadé nebeshtah kort ke wahdé káyán, hamá mardom maná gamig makanant ke áyáni kár mani shádmán kanag ent. Man shomay bárawá deljam án ke mani shádmáni shomay sajjahénáni shádmáni ent.

4 Man pa shomá gón mazanén paréshánié, dardén delé o arsigén chammé nebeshtah kort. Man nalóthet shomára gamig bekanán, man lóthet shomá bezánét ke shomára chinchok dósta dárán.

* 1:21 1:21 Rógen per moshag, bezán pa káréá gechén kanag o wák o twán dayag. Esráiliáni kerrá rógen per moshag bádsháh o mazanén dini péshwáyáni gechén kanagay rasmé butag.

Gonahkáray bakshag

⁵ Bale agan kasé gamay sawabsáz butag, áiá tahná maná gamig nakortag, géshén magwashán, tán haddéa shomá sajjahéni gamig kortagant.

⁶ É sezá ke géshtérén mardomán áiára dátag, pa choshén mardoméa bass ent.

⁷ Nun sharter esh ent ke shomá áiá bebakshét o tasallá bedayét, chó mabit ke zyádahén gam áiá chér betarrénant.

⁸ Gorhá gón shomá dazbandia kanán ke pa áiá wati mehrá darshán bekanét.

⁹ Pa shomá nebeshtah kanagay dega sawabé esh at ham ke shomára bechakkásán o bezánán ke baren har hesábá parmánbardár ét yá na.

¹⁰ Shomá ke yakkéa bakshét, man ham áiá bakshán. Harché ke man bakshetah, agan anchén habaré butag ke bakshagi pakár butag, man Masihay bárgáhá shomay háterá bakshetah,

¹¹ tánke Shaytán mára rad madant, chéa ke má Shaytánay repk o honarána zánén.

Pulosay parésháni

¹² Wahdé man Masihay wasshén mestágay járay janagá Truásay shahrá sar bután, diston ke Hodáwandá pa man daré pach kortag,

¹³ bale mani del békarár at, chéa ke mani brát Titus angat ódá nayátkagat. Gorhá man mardom roksat kortant o dém pa Makduniahá shotán.

Pulosay nékniyati

¹⁴ Bale Hodáay shogr ent ke áiá mára Masihay pérózi o sóbmandiay nomáeshay rombá hawár kortag o modám démá bárt o har jágah Masihay

bárawá may zántay wasshén bóá cha má tálána kant.

¹⁵ Chéá ke Hodáay kerrá má pa hamá mardomán ham Masihay wasshén bó én ke áyán nejáta rasit o pa hamáyán ham ke gár o gomsára bant.

¹⁶ Pa yakkéá má markay bó én o marka kárén o pa degaréá zenday bó én o zenda kárén. Bale é kárá kay korta kant?

¹⁷ Bázén mardomé pa wati páedagá Hodáay habaray sawdáyá jant, bale má cha áyán naén. Hodá sháhed ent ke má Masihay barkatá pa nékniyati habara kanén, má cha hamá mardomán én ke Hodáyá dém dátagent.

3

Masihay kágad

¹ Má yakk randé padá watsatáiá* shoru kanagá én? Yá lahtén mardomay paymá mára shomay déamá sepáreshnámah pésh kanagay zalurat ent, yá mára cha shomá sepáreshnámahay gerag pakár ent?

² Shomá wat may kágad ét o may delá nebeshtah ét, har yakké eshiá wánit o zánt.

³ Záher ent ke shomá Masihay kágad ét, may hezmatáni bar o samar ét, gón mas† o syáhiá nebeshtah nabutagét, gón namiránén Hodáay Ruhá nebeshtah butagét, sengay wánekáni‡ sará nebeshtah nabutagét, ensáni delay wánekáni sará nebeshtah butagét.

* **3:1 3:1**Watsatái, bezán watgalái, watsárhái. † **3:3 3:3** Mas, bezán syáhi ke pe nebeshtah kanagá kármazá bit. ‡ **3:3 3:3**Wáneka, bezán mazanén patanén seng, wánag.

⁴ Masihay barkatá má Hodáay bárgáhá é gappá deljam én.

⁵ Gapp é naent ke má wat láhek én ke cha wati némagá choshén habaré bekanén. May láheki cha Hodáay némagá ent,

⁶ hamáíá mára nókén ahdnámagay hezmatkár bayagay láheki dátag. Bale é ahdnámag gón ábŠ o labzá nebeshtah nabutag, Pákén Ruhá naksh kortag, chéá ke ába koshit, bale Ruh zendaga kant.

Nókén ahdnámagay shán o shawkat

⁷ Nun agan hamá hezmat ke áiy ásar mark at o sengáni sará gón áb o labzán nebeshtah at, anchén shán o shawkaté gón ati ke Esráilián Mussáay dém tán dérá cháret nakort, hálánke á shán o shawkat kamm tarrán at,

⁸ gorhá Pákén Ruhay hezmatay shán wa sakk báz géshter ent.

⁹ Hamá hezmat ke mayárbária kárit, agan áiy shán o shawkat hastat, gorhá hamá hezmat ke rástáwari o bémáyaria kárit, áiy shán o shawkat wa sakk báz géshter ent.

¹⁰ Á chizz ke shán o shawkatá sarréch at, nun hecch shawkati mán nést, agan gón hamá chizzá dém pa démi bekanay ke áiy shawkat békesás ent.

¹¹ Nun hamá chizz ke halás bayagi at, agan áiy shán o shawkat mán at, gorhá á chizz ke mánit, áiy shán wa sakk báz géshtera bit.

¹² Nun ke mára é omét hastent, may del sakk dhaddh ent,

Š 3:6 3:6Áb, bezán harp, Angréziá: "letter in the alphabet".

¹³ má Mussáay paymá naén. Áiá wati dém gón nekábéá póshet tánke Esráili é halás bayókén shán o shawkatay tamáshahá machárant.

¹⁴ Bale áyáni agl kór but, chéá ke tán maróchigá kwahnén ahdnámagay wánagay wahdá hamá nekáb angat per ent. Nekáb dur kanag nabutag, hamá wahdá dura kanaga bit ke taw Masihay sará imán byáray.

¹⁵ Tán maróchigá ham wahdé Mussáay Sharyat wánaga bit, nekáb áyáni delay sará ent.

¹⁶ Bale wahdé kasé démá tarrénit o Hodáwanday némagá kayt, é nekáb dur kanaga bit.

¹⁷ Hodáwand Ruh ent o har jágah ke Hodáwanday Ruh ent, ázáti hamódá ent.

¹⁸ Gorhá má ke gón bénekábén démá chó ádénekéá Hodáwanday shán o shawkatá záhera kanén, róch pa róch má hamáiy rang o dróshomá gerén o may shán o shawkat géshtera bit. É shán o shawkat cha Hodáwanday némagá kayt, Hodáwand ke Ruh ent.

4

Nuray ganj o hákién badan

¹ Gorhá má delprósha nabén, chéá ke Hodáyá may sará rahm kortag o mára é hezmatay zem-mawárii dátag.

² Má watará cha chérén o sharmnákén kárán dur dáshtag. Má na makkária kanén o na Hodáay paygámá badala kanén. Hodá sháhed ent ke má rástíá hecch chéra nadayén o watá sajjahénáni zamiray démá pésha kanén ke may gwáhiá bedayant.

³ O agan may wasshén mestág chér o andém ent ham, gorhá pa hamáyán andém ent ke gár o gomsára bant.

⁴ Hamá mardom ke Hodáy sará imána nayárant, é jahánay soltáná, bezán Shaytáná áyáni agl kór kortag, tánke wasshén mestágay rozhná dist makanant, hamá rozhn ke Masihay shán o shawkatá záhera kant, Masih ke Hodáy rang o dróshom ent.

⁵ Chéá ke má wati jenday járá najanén, má jára janén ke Issá Masih Hodáwand ent o má pa Issáygi shomay hezmatkár én.

⁶ Hamá Hodá ke gwashti: “Cha taháriá rozhnái bebit”,* hamá Hodáyá may delay tahá wati rozhn drapshént tánke má cha Issá Masihay démay nurá Hodáy shán o shawkatá pajjáh byárén.

⁷ Bale é nur ganjé o gelay darpéá bezán may badaná ent tánke zánag bebit ke é békesásén zór may naent, Hodáyag ent.

⁸ Má cha har némagá sakki o sóriáni ámách én, bale naproshtagén. Hayrán én, bale náomét naén.

⁹ Mardom mára ázára dayant, bale Hodá mára yalaha nakant. Mára boná dawra dayant, bale má hákán hawára nabén.

¹⁰ Gorhá, mára modám Issáy mark badaná ent o gardagá én, tánke may badaná Issáy zend ham záher bebit.

¹¹ Chéá ke má ke zendag én, modám pa Issáygi markay dastá dayag bayagá én tánke cha may hákién badaná Issáy zend záher bebit.

¹² Gorhá má gón marká dém pa dém én, bale shomá zenday ambázán ét.

* **4:6 4:6** Bechár Pédáesh 1:3.

¹³ Nebeshtah ent: “*Maná báwar at, paméshká man habar kort.*”† May imán ham hamé paymá ent, gorhá mára ham báwar ent o paméshká habara kanén.

¹⁴ Má zánén, hamáia ke Hodáwandén Issá padá zendag kort, á mára ham gón Issáyá zendaga kant o shomay hamráhia mára wati bágáhá bárt.

¹⁵ É sajjahén chizz pa shomay páedagá ant tánke hamá rahmat ke géshá gésh sheng bayagá ent, áia y wasilahá shogrgozári géshá gésh bebit o Hodáyá shán o shawkat berasit.

¹⁶ Paméshká má delprósha nabén. Bell toré may záher kwahn tarrán ent, bale may báten har róch nók bayán ent.

¹⁷ Chéa ke may annugén kasánén o damánoki sakki o sóri pa má anchén abadmánén shán o shawkaté pédá kanant ke cha har chizzá báláter o porarzeshter ent.

¹⁸ Chéa ke may chamm záherén chizzán sakk naant, hamá chizzán sakk ant ke gendaga nabant. Chéa ke á chizz ke záher ant, damánoki ant o á ke gendaga nabant, abadmán ant.

5

Ásmáni lóg

¹ Wahdé may zemini gedán tabáha bit, bezán may jesm o ján gón háká hawára bit, má zánén ke mára cha Hodáay némagá lógé hast ke ensáni dastéa nabastag, bezán may ásmáni o abadi badan.

† 4:13 4:13Zabur 116:10.

² Má nálén o pa é gappá zahirwár én ke wati é zemini gedáná gón ásmáni lógá badal bekanén, anchó ke póshák badal kanaga bit.

³ Wahdé má ásmáni pósháká gwará kanén, jándara nabén.

⁴ Chéá ke tán wahdé ke má é gedáná én, hamé gránén báray chérá nárén o áha kasshén ke jándar mabén. Má lóthén ke géshter setr bebén, tánke harché ke abadi naent, zend áia ér bebárt.

⁵ Hamáia ke mára pa é maksadá tayár kortag Hodá ent o pa zamánat wati Pákén Ruhi mára dátag.

⁶ Gorhá má dáemá deljam én o zánén ke tánke má wati zemini badaná én, cha Hodáwandá dur én.

⁷ May zenday bonyád imán ent, záheri chizz naant.

⁸ Má deljam én o mára washtera bit ke cha badaná dur bebén o Hodáwanday kerrá bebén.

⁹ Má wati badaná bebén yá cha badaná dhann, may maksad hamesh ent ke Hodáwandá razá bekanén.

¹⁰ Chéá ke má sajjahén báyard ent Masihay hakdiwána* pésh bebén, tánke harkasá wati zendá kortagén káráni mozz berasit, sharrén kár bebant yá harábén.

Hodá o ensánay wassháni

¹¹ Má ke hodátorsiy mánáyá zánén, kóshesta kanén ke é dega mardomán ham sarpad bekanén. Hodá mára sharriá zánt o maná omét ent ke shomay zamir ham mára sharriá zánt.

* **5:10 5:10** Hakdiwán, bezán ámidges, dadgáh.

¹² Má shomay kerrá watsatáia nakanén, bale má shomará mókaha dayén ke may sará pahr bebandét tánke betwánét hamá mardománi passawá bedayét ke delay niyatay badalá zaheri chizzáni sará pahra bandant.

¹³ Agan má ganók én, gorhá Hodáay háterá ganók én o agan sár én, gorhá pa shomá sár én.

¹⁴ Masih mára dósta dárít o má é mehray páband én, chéá ke má zánén, yakké ke sajjahénáni háterá mort, bezán sajjahén mortant.

¹⁵ Á pa sajjahénán mort tánke hamá ke zendag ant, cha ed o rand pa wat zend magwázénant, pa hamáia zend begwázénant ke pa áyán mort o padá zendag but.

¹⁶ Gorhá cha ed o rand má hechkasá donyái hesábá nacháren. Má yakk zamánagé Masih donyái hesábá cháret, bale nun chosha nakanén.

¹⁷ Paméshká harkas ke Masihay ráhá ent, á nókén mardomé. Áiay kwahnén zend halás butag o nókén zendi shoru butag.

¹⁸ É sarjamiá cha Hodáay némagá bit. Áiá Masihay wasilahá mára gón wat wasshán kort o mára sohl o wassháníay hezmatkárii parmát,

¹⁹ bezán Hodá Masihay bátená at o donyái gón wat wasshán kort. Áiá mardománi gonáh áyáni jenday sará naladdhetant o sohl o wassháníay paygámay sheng kanagay kári mára dát.

²⁰ Gorhá má Masihay nomáendah én, gwashay Hodá cha may wasilahá wati arz o mennatá shomará sar kanagá ent. Má cha Masihay némagá gón shomá dazbandia kanén: gón Hodáyá wasshán bebét.

²¹ Hamá ke bégonáhé at, Hodáyá pa maygi gonáh áiy sará dátant, tánke áiy barkatá má Hodáy bargáhá rástáwar o bémayár bebén.

6

¹ Má Hodáy hamkáráni hesábá gón shomá dazbandia kanén ke Hodáy rahmat ke shomará rasetag, áia zawál makanét.

² Chéa ke Hodá gwashit:

*“Man rahmatay wahdá tai habar gósh dásht o nejátay róchá tai madat kort.”**

Tará gwashán, nun Hodáy rahmatay wahd ent, nun nejátay róch ent.

Pulosay sakki o sóri

³ Má hechkasay pádáni démá mán gisshénókén seng dawra nadayén tánke may kár o hezmatay bárawá kasé badén gappé majant.

⁴ Má cha wati har kára pésha dárén ke Hodáy hezmatkár én: gón mazanén sagg o bardáshtá, ázár o sakki o sóri o janjáláni tahá,

⁵ latth o kotth o zendán o shóresháni tahá, hédréchi o shappási o gozhnay tahá,

⁶ gón páki, gón sarpadi, gón sabr o ópár, gón mehrabáni, gón Pákén Ruhá ke may delá ent, gón rástén mehrá,

⁷ gón rástiy habaray bayán kanagá, gón Hodáy zórá, gón rástáwariay seláhán ke may rástén o chappén dastá ant,

⁸ ezzat o béezzati o bannámi o washnámiay tahá. Mardom mára rad dayóka gwashant, bale má rástiy sará óshtátágén.

* **6:2 6:2** Eshayá Nabyay Ketáb 49:8.

⁹ Má námđár én bale kass mára mána nayárit. Chó mordagá én bale esh ent, zendag én. Latth o kotth bayagá én, bale koshag nabutagén.

¹⁰ Gamáni tahá én, bale modám shádán én. Garib o nézgár én, bale bázéné sér o ábáda kanén. Mára hecch nést bale har chizzay wáhond én.

¹¹ Oo Korentián! Má gón shomá tachká gapp jatag o wati del pa shomá práh kortag.

¹² May del pa shomá práh ent, bale shomay del pa má práh naent.

¹³ Shomá mani chokk ét, gón má hamá paymá bekanét ke má gón shomá kanagá én, shomá ham wati delá práh bekanét.

Gón nábáwarán sharikdár mabét

¹⁴ Gón nábáwarán yakkén jogay† chérá mabét. Rástáwari o badkári hamráha nabant o rozhnái gón taháriá hamráhdária nakant.

¹⁵ Masih o Shaytánay nyámá hecch hamshawri nést. Báwarmandá gón nábáwará hecch sharikdári nést.

¹⁶ Hodáay lóg o bot yakjáha nabant. Chéá ke má namiránén Hodáay lóg én, anchó ke Hodáyá gwashtag:

“Man áyáni nyámá jahmenenda bán o

áyáni hamráha bán.

Man áyáni Hodá bán o

á mani kawma bant.”‡

¹⁷ Paméshká Hodáwanda gwashit:

“Cha esháni nyámá dar áét o jetá bebét o

nápákén chizzán dast majanét,

† **6:14 6:14** Jog dáré ke pa zeminay nangár kanagá do gókay gardená bandanti. ‡ **6:16 6:16**Láwiáni Ketáb 26:12; Eremyá Nabiay Ketáb 32:38; Hezekiál Nabiay Ketáb 37:27.

gorhá man shomára dasta gerán”§ o
18 “*man shomay Peta bán o*
shomá mani bacch o jenekka bét,”
*zórmandén Hodáwanda gwashit.**

7

1 Oo mani dordánagén dóstán! Nun ke gón má é kawl o wádah kanag butagant, byáét watá cha har choshén chizzéá páka kanén ke jesm o ruhá ná páka kant o pa hodátorsi dém pa kámelén páki o palgáriá rawén.

Pulosay shádmáni

2 Mára wati delá jágah bedayét. Má gón hechkasá radén káre nakortag, má hechkas gomráh nakortag, má cha hechkasá ná jáezén páedag chest nakortag.

3 Man pa shomay malámat kanagá chó gwashagá naán, man pésará ham gwashtag ke shomá may delá anchó jágah kortag ke may zend o mark gón shomá bandók ent.

4 Shomay bárawá man sakk deljam án. Man shomay námá pa mazanén pahré gerán. Mani del dhaddh ent, may sajjahén sakki o sóriáni tahá ham man galá bál án.

5 Má ke Makduniahá sar butén, ódá ham mára áramá naeshtesh o har némagá ázáresh dát. Dhanná jang o jérhah at o tahá tors.

6 Bale Hodá delpróshán tasallá dant. Hodáyá Titus may kerrá sar kort o mára tasallá dát.

§ 6:17 6:17 Eshayá Nabiay Ketáb 52:11; Hezekiál Nabiay Ketáb 20:34, 41. * 6:18 6:18 Samwél Dágaray Domi Ketáb 7:8, 14.

⁷ Titusay áyagay tasallá yakk némagé o hamá tasallá yakk némagé ke shomá áiará dátatag. Áiá mára hál dát ke shomára pa man zahira kant, sakk paréshán ét o shomára mani gam per ent. Nun man galá bál bután.

⁸ Mani kágadá shomára gamig kort, bale man pashómán naán. Pésará ke diston mani kágadá shomára gamig kortag, pashómán bután, albat shomay é gamá tán dérá nadásht,

⁹ bale nun man gal án, pa é habará na ke man shomára gamig kort, paméshká gal án ke é gamá shomára dém pa tawbahá bort. Shomay gam Hodáay razá at o shomára cha may némagá hecch paymén táwáné naraset.

¹⁰ Hodái gam o andóh dém pa tawbahá bárt o tawbah dém pa nejátá bárt o choshén andóh hecch paymén pashómánié nayárit. Bale donyái gam o andóh marka kárit.

¹¹ Bechárét, é Hodái gamá shomay bátená ché ché pédá kortag: hobb o wáhag, wati bémayáriay sábet kanagay johd, zahr gerag, tors, zahir, jósh o gayrat, ensápdósti. Shomá har paymá sábet kortag ke é káray tahá shomára gonáh nést.

¹² Bell toré á kágad man pa shomá nebeshtah kort, bale hamá mardomay sawabá nakort ke radén kári kortag, na ke áiay sawabá ke gón áiá radén kár butag. Man paméshká nebeshtah kort ke hamá hobb o wáhag ke shomára pa má hastent, Hodáay bárgáhá shomá wat áiá begendét.

¹³ Cha eshiá mára delbaddhi rasetag.

May delbaddhi wati jáhá, wahdé má dist ke Titus chó gal ent, may wasshi angat géshter but.

Chéa ke shomá sajjahénán áiy arwáh tázag kortag.

¹⁴ Man áiy kerrá shomay sará pahr bastagat o shomá mani sar jahl nakort. Harché ke má gón shomá gwashtagat, rást at o hamé paymá Titusay kerrá shomay sará may pahr bandag ham rást at.

¹⁵ Wahdé Titus yátá kapit ke shomá chón parmánbardár atét o shomá chón pa mazanén ezzat o ehterámé á wasshátk kort, pa shomá áiy mehr géshtera bit.

¹⁶ Man gal án ke shomay bárawá har hesábá deljam án.

8

Chandahay bárawá

¹ Nun oo brátán, má shomará hamá rahmatáni bárawá hál dayaga lóthén ke Hodáyá Makduniahay kelisáyáni sará gwáréntagant.

² Gránterén chakkás o ázmáesháni tahá, bell toré sakk tangdast butagant, bale áyáni del cha shádmániá sarréch butag o áyáni ganjén daspachi záher butag.

³ Man sháhed án ke áyán pa wasshi o razá wati gonjáeshá dátag o cha gonjáeshá gésh ham.

⁴ Cha má sakk báz dazbandiesh kort ke mará palgártagénáni é chandahá gón bayagay ezzatá bedayét.

⁵ Má cha áyán inchok komakkay omét ke dáshtagat, áyán angat géshter dát. Awalá watará Hodáwanday dastá dátesh o gón Hodáay razáyá watará may dastá ham dátesh.

⁶ Gorhá má Titus parmát ke taw é nékén kár ke Korentiáni kerrá bongéj kortag, eshiá sarjam ham bekan.

⁷ Gorhá anchó ke shomá sajjahén chizzán déamá ét, imáná, gapp o bayáná, zántá, kámelén johdá o wati hamá mehrá déamá ét ke má shomay tahá pédá kortag, nun má lóthén ke shomá é nékén kára ham déamá bebét.

⁸ Man shomára hokm nadayagá án, man bass lóthán ke shomay mehrá gón degaráni johdá dém pa dém bekanán o shomay mehray rástia bechakkásán.

⁹ Chéá ke shomá may Hodáwandén Issá Masihay rahmatána zánét. Hálánke á har chizzay málek at, bale shomay háterá watá garib o nézgári kort ke gón áiy nézgáriá shomára Hodái ganj berasit.

¹⁰ É káray bárawá pa shomá mani sar o sój esh ent: pári shomá awali atét, tahná chandah kanagay jendá na, é káray erádahá ham awali atét.

¹¹ Nun wati bendát* kortagén kára wati gonjáeshay hesábá sarjam bekanét, tánke é káray sarjami shomay hobb o wáhagá sábet bekant.

¹² Chéá ke chandah hamá wahdá zurag buta kant ke dayók pa hobb o wáhagé bedant o áiy gonjáeshá ham bebit, cha áiy gonjáeshá dhann mabit.

¹³ Má nalóthén ke shomá janjál bebét o degaré ásudag bebit. Má lóthén ke barábari bebit.

¹⁴ É wahdi shomay ganjén mál o hasti áyáni zaluratán puraha kant, tánke agan yakkk róché shomay dast tang but, áyáni mál o hasti shomay zaluratán purah bekant. É dhawlá barábari barjáh dáruga bit,

* **8:11 8:11** Bendát, bezán bongéj, shoru.

15 anchó ke nebeshtah ent: *“Á kasá ke báz zortag, pa áiá gësh naant o á kasá ke kammok zortag, pa áiá kamm naant.”*[†]

Titus Korentá rawt

16 Hodáay shogr ent ke áiá Titusay delá pa shomá hamá hobb o wáhag pédá kortag ke maná pa shomá hastent.

17 Chéa ke tahná may dazbandiay sará na, Titus pa hobb o wáhagé, cha wati wasshiá shomay kerrá pédák ent.

18 Má áiay hamráhiá hamá brátá ham ráh dayagá én ke sajjahén kelisá áiay ezzatá kanant, chéa ke á, wasshén mestágá sheng kanagá ent.

19 Eshiá abéd‡, á cha kelisáyáni némagá gechén kanag butag ke chandahay rasénagay é hezmatá may hamsapar bebit ke má é kárá pa Hodáwanday shán o shawkatá o gón hobb o wáhagé kanagá én.

20 Má nalóthén ke é ganjén chandahay entezámay bábatá kasé mára bohtámé bejant.

21 Mára é gam per ent ke kojám kár sharr ent, tahná Hodáwanday déma na, mardománi déma ham.

22 Esháni hamráhiá má wati dega braté ham ráh dayagá én. É brátá har warhá pésh dáshtag ke pa má chinchok hobb o wáhagi hast o nun áiay hobb o wáhag gështer ent, chéa ke shomay bárawá deljam ent.

23 Titusay bárawá begwashán ke hamé hezmatá ke man pa shomá kanagá án, á mani hamkár ent o wati á brátáni bárawá begwashán ke kelisáyáni kásed ant o Masihay shán o shawkat ant.

[†] 8:15 8:15 Darraw 16:18.

‡ 8:19 8:19 Abéd (cha), bezán gayr cha.

²⁴ Gorhá é mardománi démá wati mehrá sábet bekanét o kélisáyán pésh bedárét ke shomay sará may pahr bébonyád naent.

9

Chandahay bárawá dega lahtén gapp

¹ Hamá kár ke pa palgártagénán bayagá ent, zalurat naent ke man áiy bárawá pa shomá nebeshtah bekanán.

² Chéá ke pa komakk kanagá shomay hobb o wáhagá zánán o pa é gappá sará man Makduniahay báwarmandáni kerrá shomay sará pahr bastag. Man áyáni kerrá gwashtag ke shomá, bezán Akáyahay báwarmand, párigén ent pa chandahay dayagá tayár ét. Shomay hodónákiá bázénéay hobb pád kort.

³ É brátán paméshká ráh dayagá án ke sábet bebit ke má é bárawá shomay sará watsará pahr nabastag o paméshká ham ke shomá tayár bebét, anchó ke man gwashtag ke shomá tayár ét.

⁴ Chó mabit ke Makduni mani hamráhiá byáyant o begendant ke shomá tayár naét. Gorhá may sar jahla bit o shomay ganter, chéá ke shomay bárawá má deljam butagén.

⁵ Gorhá man cháret ke lázom ent gón brátán dazbandi bekanán o pésará shomay kerrá ráhesh bedayán ke hamá ganjén chandahay tayáriá bekanant ke shomá kawl kortag, tánke é kár daspachén sawgátéay hesábá sarjam bebit, pa nádelkasshi dátagén baksheshéay hesábá na.

⁶ Gapp esh ent ke harkas ke kamma keshit, kamma ront o harkas ke báza keshit, báza ront.

⁷ Harkas haminchok bedant ke delia gwashit, pa nádelkasshi o majburi na, chéá ke Hodá hamá kasá dósta dárít ke cha wati wasshi o razáyá dant.

⁸ Hodá wati sajjahén rahmatán shomay sará gwárénta kant, tánke shomay kerrá modám zaluratay har chizz bebit o shomá har nékén kará déamá bebét,

⁹ anchó ke nékkaréay bárawá nebeshtah ent:
“Áiá rétkag, gón daspachi nézgáráná dátagi,
áiy nékdeli abadmán ent.”*

¹⁰ Nun Hodá ke dehkáná pa keshagá tohm o pa waragá nagana dant, shomay gonjáeshá géssha kant o shomará nékdeliay sharrén mozzé dant.

¹¹ Shomay kerrá hecch chizzay kammia nabit tánke shomá har wahdá pa daspachi dát bekanét o wahdé má é chandahá rasénén, shomay é daspachiay sawabá Hodáay shogr gerag bebit.

¹² É hezmatá ke shomá kanagá ét, é tahná palgártagénáni zaluratán puraha nakant, bázén mardoméay delá cha Hodáay shográ sarréch ham kant.

¹³ Shomay é kár o hezmatay sawabá mardom Hodáay satá o sanáyá kanant, chéá ke pa áyán o pa dega harkasá shomay daspachi sháhedié ke shomá Masihay wasshén mestágay parmánbardár ét.

¹⁴ Á pa mazanén hobb o wáhagé pa shomá dwá kanant parchá ke Hodáyá wati ganjén rahmat shomay sará gwáréntagant.

¹⁵ Hodáay shogr ent pa áiy sawgátá ke cha tawsipá dhann ent.

* 9:9 9:9 Zabur 112:9.

10

Pulos bohtámáni passawá dant

¹ Mani bárawá gwashaga bit ke shomay déamá “narm” o shomay báposhtá “trond” án, mane Pulosay jend Masihay békebri* o narmiay barkatá shomará mennata kanán o

² dazbandia kanán ke wahdé shomay kerrá káyán, á paymá ke man gón lahtén mardomá trond bayagay erádah kortag, maná majbur makanét ke inkas trond bebán. É hamá mardom ant ke may bárawá gwashant ke é mardom donyái zendé gwázenagá ant.

³ Chéa ke bell toré má é donyáyá én, bale donyái warh o paymá janga nakanén.

⁴ May jangi seláh donyái seláh naant. May seláhán Hodái zóré mán ke dozhmenay kalátán bekarójan† o bepróshant.

⁵ Har gorunáki‡ ke hodázántiay déamá óshtit, má áia karójén o dawra dayén. Har sarkasshén pegr o hayálá bandiga kanén tánke é pegr Masihay parmánbardár bebant.

⁶ Wahdé shomá sharriá parmánbardár bét, gorhá má tayára bén ke har náparmániay sezáyá bedayén.

⁷ Shomá záheri chizzána chárét. Agan kasé deljam ent ke Masihayg ent, wati delá padá hayál bekant ke má ham hamáiy paymá Masihayg én.

⁸ Hodáwandá pa shomay rost o rodómá mára wák o ehtiár dátág, pa shomay gár o tabáh kanagá

* **10:1 10:1** Békebri, bezán kebr o gorur nakanag, magrur nabayag.

† **10:4 10:4** Karójag, bezán harójag, addh kortagén chizzéay próshag.

‡ **10:5 10:5** Gorunáki, bezán gorur, porkebri.

na, o agan man é wák o ehtiáray sará kammé géshén pahré bebandán, angat ham sharmendaga nabán.

⁹ Mana nalóthán ke shomá chó hayál bekanét ke mani kágadáni maksad shomay torsénag ent,

¹⁰ chéá ke lahténa gwashit: “Áiay kágad wazandár o zórmand ant, bale áiay jendá ke gen-day, nezór ent o gappi béarzesh ant.”

¹¹ Choshén mardom báyard ent bezánant ke má yakkén paymá én, o é chizz durá cha may kágadán záher ent o dém pa démá cha may kár o kerdán.

¹² Márá é hemmat nést ke watá gón hamá mardomán yakk bekanén yá watá gón hamáyán dém pa dém bekanén ke watsatáia kanant. É mardom watá gón yakdomiá dém pa dém o kesása kanant. É nádánié.

¹³ Má géshén pahra nabandén, bass tán hamá haddá pahra bandén ke Hodáyá pa má gishshéntag, o shomá ham may pahray hadday tahá ét.

¹⁴ Má géshén pahra nabandén, agan shomay kerrá mayátkénén, gorhá may pahr géshéné butagat. Bale má awali mardom aténi ke Masihay wasshén mestág tán shomay kerrá ham sar kort.

¹⁵ Degaráni káráni sará géshén pahr ham nabandén, bale ométa kasshén haminchok ke shomay imán rost o rodóma kant, shomay nyámá may káráni patth o perh master bebit,

¹⁶ tánke cha shomay hadd o simsarán hamá dém wasshén mestágay járá jat bekanén. Má nalóthén hamá káray sará pahr bebandén ke degaréay hand o damagá pésará kanag butag.

¹⁷ *Harkas ke pahra bandit, Hodáwaday sará*

pahr bebandit. §

¹⁸ Chéá ke á kas ke wati satáyá wata kant, á kabula nabit, hamá mardom kabula bit ke Hodáwand áiy satáyá kant.

11

Pulos o drógén kásed

¹ Omét ent ke shomá mani nádániá kammé bardáshta kanét. Shomá chónáhá bardásht kanagá ét.

² Man pa shomá anchó hasaddig án ke Hodá hasaddig ent. Man shomará yakk mardéay námgept kortag, bezán Masihay tánke shomará chó pákdámonén neshtagén jenekkéá Masihay bárgáhá pésh bekanán.

³ Bale mani tors esh ent, anchó ke már átk o pa makkári Hawái gomráh kort, shomay del á paymá gomráh mabit o pa Masihá shomay pákdámoni o wapádári zawál mabit.

⁴ Chéá ke agan kasé shomay kerrá byayt o hamá Issáyá abéd ke má áiy jár jatag, dega Issáéay járá bejant, shomá pa ásáni eshiá mannét. Yá hamá Ruh ke shomará rasetag, áíá abéd shomará dega ruhé bedant, shomá mannét. Yá hamá wasshén mestág ke shomá mannetag, áíá abéd shomará dega wasshén mestagé bedant, eshiá ham mannét.

⁵ Bale mani hayálá man cha é “thuhén kásedán” kamter naán.

⁶ Man balkén habarzánté n aán, bale bézánté ham naán. Má é chizz har paymá shomay déma sarjamiá sábet kortag.

⁷ Záná, mani gonáh hamesh at ke man Hodáay wasshén mestág bé mozzá shomárá sar kort o é paymá watará jahl jat tánke shomá borz bebét?

⁸ Man á dega kelisá “poletant”, bezán man cha áyán zarr gept ke shomay hezmatá bekanán.

⁹ Wahdé shomay kerrá atán o chizzéa gatth bután, hechkasay sará bár nabután, chéa ke cha Makduniahá átkagén brátán mani zalurat purah kortant. Man was kortag o angata kanán ke shomay sará béré mabán.

¹⁰ Anchó ke Masihay rásti mani delay tahá mohkam ent, hamé paymá é habar ham mohkam ent ke Akáyahay damagá kas maná gwashta nakant ke é pahrá maband.

¹¹ Chéa? Parchá ke man shomárá dósta nadarán? Hodá zánt ke man shomárá dósta dárán.

¹² É kára ke annun kanagá án, eshiá démterá ham kanán, tánke hamá mardom ke móhéay shóházá ant ke pahr bebandant o begwashant má gón Pulos o áiy hamráhán barábar én, áyán é móh marasit.

¹³ Choshén mardom drógén kásed o prébkárén mozzur ant ke Masihay kásediy pósta gwará kanant.

¹⁴ É hayráni gappé naent, chéa ke Shaytánay jend ham nuránién préshtagéay pósta gwará kant.

¹⁵ Gorhá é hayráni gappé naent ke áiy hezmatkár ham rástáwariay hezmatkáráni pósta gwará bekanant. Eshán wati kár o kerdáni hesábá sezá rasit.

Pulosay sakki o sóri

¹⁶ Padá gwashán ke kass maná ahmaké sarpad mabit. Bale agan shomá maná ahmaké sarpada

bét, gorhá maná bardásht bekanét, tánke kammé pahr bebandán.

¹⁷ Gorhá é pahr ke eshiay sará man deljam án, é Hodáwandi habaré naent, ahmaki habaré.

¹⁸ Bázén mardomé donyái mardománi paymá pahr bandagá ent, bell ke man ham pahra bandán.

¹⁹ Shomá aglá sarréch ét, paméshká pa galé ahmakáni bardáshtá kanét.

²⁰ Rástén habar esh ent ke wahdé kasé shomará goláma kant yá shomay mál o hastiá polit yá cha shomá páedag chesta kant yá watá mazana kant yá shomará shahmáta jant, shomá bardáshta kanét.

²¹ Maná é gappay janag lajja kant ke má pa é káráni kanagá sakk nezór én.

Man ahmakéay hesábá gappá án ke agan choshén chizzé hast ke kasé áiay sará pahr bast bekant, gorhá man ham á chizzay sará pahra bandán.

²² É drógén kásed Ebráni ant? Man ham Ebránié án. Esráili ant? Man ham Esráilié án. Ebráhémay nasl o padréch ant? Man ham Ebráhémay nasl o padréch án.

²³ É mardom Masihay hezmatkár ant? Nun ganóki gappé janagá án, man masterén hezmatkaré án. Man géshter kár kortag, géshter zendáná neshtagán, géshter latth wártag o báz randá gón marká dém pa dém butagán.

²⁴ Yahudián maná panch randá shallák o hayzarán jatag, har randá cha chell shalláká bass yakké kamm.

²⁵ Man say randá latth janag butagán, yakk baré

sengsár kanag butagán, say randá mani bójig*
proshtag o shapé o róché man daryáyá gwázéntag.

²⁶ Man bázén saparé jatag o gón warh warhén
hatarán dém pa dém butagán: kawráni hatar,
dhong o rahzanáni hatar, hamkawmáni hatar,
darkawmáni hatar, shahray hatar, gyábánay
hatar, daryáyay hatar o drógén brátáni hatar.

²⁷ Man sakk báz kár kortag o zahmat kasshetag,
báz randá béwábi saggetag, shod o tonn distag o
báz randá waragay móh narasetag, gwahr o sardi
pa jándari gwázéntagant.

²⁸ Eshán abéd, har róch sajjahén kelisáyáni gam
mani sará ent.

²⁹ Harkasay nezóri maná nezóra kant. Harkas
ke cha Hodáyá wati démá tába dant, man tahá
sochán.

³⁰ Agan pahr bandagi ent, gorhá man wati
nezóriáni sará pahra bandán.

³¹ Hodá, bezán Hodáwandén Issáy Peta zánt ke
man dróg bandagá naán, hamá Hodá ke tán abad
satá o saná karzit.

³² Wahdé man Dameshká atán, Arétás bádsháhay
wáliá shahray darwázagán sepáhig nádént ke
maná dazgir bekanant.

³³ Maná mardomán lachéay† tahá kort o cha
shahray diwálay darigéá jahlá ér dát o cha áiy
dastá rakketán.

12

Pulosay ásmáni sapar

* **11:25 11:25** Bójig, bezán lánch, kashti. † **11:33 11:33** Lach cha
pissh yá dega tákán jórh kortagén mazanén darpé.

¹ Man báyard ent pahr bebandán, bell toré cha eshiá páedagé narasit. Nun man cha Hodáwaday némagá rasetagén elhám o shobénagáni habará kanán.

² Man yakk Masihi báwarmandé zánán ke chárdah sál pésar sayomi ásmáná barag butag, bárén gón jesmá yá bé jesmá, nazánán, Hodá zánt.

³ Man é gappá ham zánán ke é mard, gón jesmá yá bé jesmá, nazánán, Hodá zánt,

⁴ baheshtá barag butag o anchén gapp eshкотag ke ensán áyán gwashta nakant, anchén gapp ke ensáná áyáni kanagay ejázat nést.

⁵ Man choshén mardoméay sará pahra bandán, wati sará na, bass wati nezóriáni sará pahra bandán.

⁶ Pahr bandag belóthán ham, ahmaké nabán, chéa ke rásténá gwashán. Bale pahréza kanán, tánke hechkas cha é kárán ke man kanagá án o cha é gappán ke man janagá án maná master makant,

⁷ bell toré maná é hayrán kanókéen elhám o shobénag rasetagant. Paméshká mani badaná konthagé mán ke man gwát magerán, bezán Shaytánay kásedé mani sar o bahtán kaptag ke maná azáb bekant tánke man gorunák mabán.

⁸ Say randá man Hodáwaday kerrá peryát kortag ke eshiá cha man dur kan.

⁹ Bale Hodáwanda maná gwasht: “Tará mani rahmat wat bass ant, chéa ke mani zóray kámeli nezóriay tahá ent.” Gorhá man pa bázén galé wati nezóriáni sará pahra bandán tánke Masihay zór o wák mani hamráh bebit.

¹⁰ Paméshká Masihay háterá wati nezóriáni tahá gal án, bad o rad o sakki o ázár o moshkeláni tahá

gal án. Chéá ke wahdé nezóra bán, gorhá zórmanda bán.

Pa Korentián Pulosay parésháni

¹¹ Man watará ahmaké jórh kortag, bale maná shomá majbur kortag. Báyard ent shomá mani sepáresh bekortén, chéá ke man cha é “thuhén kásedán” kamter naán, bell toré hecché naán.

¹² Man gón sabr o ópáre rástén kásedéay sajjahén nesháni shomay démá záher kortagant, bezán ásmáni nesháni o hayrán kanókén kár o mójezah.

¹³ Shomá cha é dega kelisáyán che paymá kamter ét? Paméshká ke man hechbar shomay sará báré nabutagán? Mani é “náensápiá” pahell kanét.

¹⁴ Nun man tayár án ke sayomi randá shomay gendagá byáyán o shomay sará báré nabán. Shomay mál o hastiá nalóthán, shomay jendá lóthán. Chónáhá ham, chokkáni zemkawári naent ke pa pet o mátán bechenant o ér bekanant, pet o mátáni zemkawári ent ke pa chokkán bechenant o ér bekanant.

¹⁵ Harché ke maná hast, man pa galé shomay sará harcha kanán, wati sáhá ham pa shomá nadra kanán, bale shomá maná paméshká kamter dósta dárét ke man shomará sakk báz dósta dárán?

¹⁶ É gappá bemannét ke man shomay sará báré nabutagán. Angat shomá gwashét ke man makkárén mardomé án o man shomará pa honar geptag.

¹⁷ Záná, man anchén mardomé shomay kerrá ráh dátag ke shomará poletagi?

¹⁸ Man gón Titusá gwashtag ke shomay kerrá byayt o may brát ham man gón áia ráh dát. Titusá

wa shomará napoletag, yá poletagi? Mani o Titusay ráh o rawesh yakk naat? Má yakráh naatén?

¹⁹ Balkén shomá tán é wahdi é hayálá butagét ke má shomay dé má watá washnám kanaga lóthén. Na, má Masihay barkatá Hodáay bárgáhá habará butagén. Oo dordánagén dóstán! Má harché ke kanagá én, pa shomay rost o rodómá kanagá én.

²⁰ Mani tors esh ent ke wahdé shomay kerrá káyán, begendán ke shomá á mardom naét ke mana lóthán o shomá begendét ke man á mardom naán ke shomá lóthét. Man shomay kerrá arh o korh, hasadd, zahr o hezhm, watwáhi, bohtámjani, báposhtá habar kanag, gorunáki o bénazmi gendaga nalóthán.

²¹ Chó mabit ke wahdé man káyán, Hodá maná shomay dé má sharmendag bekant o man bázénéay sawabá gamig bebán ke áyán yakk wahdé gonáh kortag, nápáki o bénangi kortag o hawá o hawasáni golám butagant o angat tawbahesh nakortag.

13

Goddhi habar

¹ É sayomi rand ent ke shomay gendagá pédák án. *Har habaray rásti gón do yá say mardomay sháhediá sábet kanag bebit.**

² Man pésará ham shomará habardár kort, domi randá ke shomay kerrá átkán, o nun ham ke shomay kerrá naán, padá gwashán ke wahdé mana káyán, á mardomán ke gonáh kortag, na

* **13:1 13:1** Mussáy Wáz 19:15.

áyáni sará rahma kanán o na é dega sajjahénáni sará.

³ Shomá sabuta lóthét ke é Masih ent ke cha mani zobáná habara kant. Masih shomay déma nezór naent, shomay tahá zórmant ent.

⁴ Rásté ke Masih nezóriá salib kasshag but, bale nun cha Hodáay zór o wáká zendag ent. Hamé paymá má ham Masihay nezóriá sharikdár én, bale pa shomaygi cha Hodáay zórá gón áia zendaga bèn.

⁵ Watá bechakkásét ke bårén shomará imán hast yá na. Watá bechakkásét. Nazánét ke Issá Masih shomay bátená ent? Agan nazánét, gorhá shomá é chakkásá kámyáb nabutagét.

⁶ Bale má kámyáb butagén. Ométa kanán ke shomá é habará zánét.

⁷ Má cha Hodáyá dwá lóthén ke shomá radén karé makanét, pa é maksadá na ke mardom begendant ke má chakkásá kámyáb butagén, pa é maksadá ke shomay kár o kerd sharr bebant, bell toré zaherá má kámyáb mabén.

⁸ Chéa ke má rástiy helápá óshtáta nakanén, bass pa rástia óshtén.

⁹ Má toré nezór bebén ham, agan shomá zórmanda bét, má gala bèn. May dwá ent ke shomá kámel bebét.

¹⁰ É habarán paméshká anchén wahdéa nebeshtah kanagá án ke man shomay kerrá naán ke wahdé káyán, majbur mabán wati wák o ehtiára pa trondi kár bebandán, hamá wák o ehtiár ke Hodáwandá maná pa shomay rost o rodómá dátag, pa shomay gár o tabáh kanagá na.

Godahi drahbát

¹¹ Oo brátán! Goddhi habar esh ent ke shádmán bebét. Pa kámeliá johd bekanét. Yakdomiá delbaddhi bedayét. Hamdel bebét. Pa émeni zend begwázénét. Mehr o émeniy Hodá gón shomá góna bit.

¹² Yakdegará gón pákén chokkagéá salám bedayét.

¹³ Eday sajjahén palgártagén mardom shomará salám kanagá ant.

¹⁴ Hodáwandén Issá Masihay rahmat o Hodáay mehr o Pákén Ruhay hamráhdári shomará sajjahénán gón bát!

Balóchi Balochi

Balochi, Southern: بلوچی **Balochi (New Testament+)**

copyright © 2016 Wycliffe Bible Translators, Inc.

Language: Balochi, Southern

Contributor: Wycliffe Bible Translators, Inc.

www.balochimestag.com

www.youtube.com/user/balochifilm

All rights reserved.

2025-04-26

PDF generated using Haiola and XeLaTeX on 25 Apr 2025 from source files
dated 26 Apr 2025

fe99fc84-11bd-5637-a7f3-a8ffa8c1dea9